

Dä ein säät su, dä andre su

Text und Musik: Hans Knipp/Bläck Fööss

Sulang et Minsche jitt he op unserer Ääd
weed jeschwaad, jelaach, jestredde un diskuteet.
Doch jet jenaues weiss keiner,
weder ich noch du.
Dä ein säät su, dä andre su.

En jeder Weetschaff aan d`r Thek,
wie et aan d`r Thek esu jeiht,
läuf dä Schwaad zom jode Schluss
miestens immer op die Schöss erus.
Ein Froch, die es für Stimmung joot
“saach stemmp dat, wat ich do jehoot,
dat ding Frau, su wie m`r säät,
em Bett esu afjeiht wie en Raket ?”
Do bes de eets ens völich baff
un putz d`r dann de Muul drop af.

Dä ein säät su, dä andre su
dat wor em Levve immer `su.
Janz ejal wie m`r et määät , janz ejal wat m`r säät,
immer määät m`r et verkeht.
Dä ein säät su, dä andre su,
un dä Esel dä bes du.
Ob m`r et joot meint oder schlääch,
nä, m`r määät et keinem rääch.

Kirchfenster für d`r Dom
sorcht für heisse Diskussion. Gerhard Richter, weltbekannt, famos
entwirf e Finster völlig kostenlos.
Dä Meissner es total jeschock,
springk fass us singem Bischofsrock.
Däm fähle Fijure met Hellijesching,
hät sich wohl selver jään dren jesinn.
Die Diskussion noch wiggerjeiht
bes en alle Iwichkeit.

Dä ein säät su, dä andre su ...

Depression em Parlament,
kaum einer do, dä Ress dä pennt.
Ordnungsruf, der Adler singt,
Deutschlandlied erklingt.
Punkt Diäterhöhung dann,
lockt die Volksvertreter an.
Alle kumme em Dauerlauf,
un halten et Händchen auf.
Dann sprechen se met einer Stemm
un jedem fällt jet anderes en.

Un wenn ding Zick jekumme es,
du hilflos durch et Weltall flüchs,
fröchs du die Engel die do sin
saach, „wie jeiht et en d`r Himmel ren ?

“Dä ein säät su, dä andre su ...

© Bläck Fööss 2008

Zitat Bläck Fööss: “Die Nutzung dieser Texte für private Zwecke ist ausdrücklich erlaubt und erwünscht. Jedwede kommerzielle Nutzung gleich welcher Form bedarf jedoch grundsätzlich unserer Zustimmung.”